

S'agriturismu comente cura contra a sa pandemia

Agriturismo cheret nàrrere cultura, tradizione, grabu, ospitalidade, cuntatu cun sa zente, camminare, respirare aera sana. Est unu modu de fàghere e de bìvere diferente. Unu logu a ue unu andat cun sa familia o sos amigos pro si tzarrare a discansu, pro lèghere unu libru intendende sos sonos de su sartu, pro si pasare sena pensamentos o solu pro si pònnera a pessare o finas pro non pessare a nudda.

E duncas s'agriturismu cheret nàrrere salute e benistare, totu cussu chi sa zente at bisonzu in custu tempus de pelea e de agorru. Cheret nàrrere finas a pònnera in discussione su chi semus e chi forsis cumbenit a fàghere una bida diferente, prus lena e non semper a sa lestra, currende, su prus de sas bortas chene ischire a ue semus andande.

Tzertu agriturismo cheret nàrrere finas màndigu sanu e de su logu. Su de andare a cussu logu e ischire de agatare cussa cosa solu in cue: cussa gasta de mela o de pira, cussa zenia de pasta o de pane, cussu durche o cussu licore, cussu.... chi non si buscat in perunu àteru logu. Est cussa chi oe li naramus biodiversidade. E tando unu cumprendet ite b'at in palas de cussu traballu e chi cussu massaju non solu est cumbidande a mandigare unu pastu de calidade chi non si buscat in aterue ma est finas mantenende bia una cosa rara, a bortas ùnica, e si non non fiat istadu pro issu aiamus una perdita manna in contu de biodiversidade.

Agriturismo cheret nàrrere a mandigare una cosa chi est produida in su matessi logu, cheret nàrrere finas prus pagu incuinamentu, ca cussu màndigu no est istadu batidu dae aterue, prus pagu arga ca cussu màndigu non est istadu garrigadu de plastica, de cartone de birdu o de àteru.

Sos agriturismos sunt postos in logos isolados, cun pagos postos a dromire e finas in mesa, inue si podet mandigare a s'abertu, pro sòlitu ant deghinas de ètaras in tundu e duncas si podet istare in foras e abarrare a largu s'unu dae s'àteru sena perìgulu. Non sunt logos inue su virus s'ispàinat antis a su contràriu sunt logos addatos pro prevènnere s'ispàinu.

E duncas in custu tempus de anneu sos agriturismos podiant èssere a beru, nessi dae su mese de abriale in susu, si organizados cun critèriu, unu mèdiu pro afrontare in manera diferente sa pandemia, una possibilidade pro dare recreu a sas familias in logos seguros inue si podiant fàghere respetare sas règulas de siguresa sena perunu anneu. Imbetzes sunt abarrados tancados, cun pèrdidas mannas non solu econòmicas pro sos operadores ma finas de salute pro sa zente.

De seguru nen sos contributos de s'istadu nen cussos de sa rezione sunt bastados a las aparisare. Pro su presente tando cheret a los sighire a azudare paghendeli in presse sos dannos, faghendeli pagare sos impòitos a discansu, o minimàndelos, pro su tempus benidore cheret a fàghere disinnos

de abaloramentu, de comunicatzione e de promotzione ma mascamente tocat de s'amentare de su ruolu non petzi econòmicu ma finas sotziale e culturale de s'agriturismu, chi podet èssere a beru unu logu pro curare sas pandemias.